

'Dulu Sekinchan jarang banjir'

Penduduk gesa PBT lakukan penyelenggaraan longkang secara berkala

SEKINCHAN - Majlis Daerah Sabak Bernam (MDSB) dan Jabatan Pengairan dan Saliran (JPS) digesa memastikan penyelenggaraan dan pembersihan longkang serta parit dilakukan secara berkala bagi mengelakkan kejadian banjir kilat.

Seorang penduduk, Mohd Razali Mohd Noor, 39, berkata, kebanyakan longkang dan parit di sekitar Sekinchan dipenuhi semak dan lalang yang tinggi hingga menyekat pengalir air.

"Kami kecewa longkang dan parit di kawasan taman perumahan, kampung tradisi, premis perniagaan dan pasar awam selalu dinaiki air disebabkan banjir kilat," katanya kepada Sinar Harian.

Mohd Razali berkata, keadaan bertambah buruk

apabila berlakunya hujan berterusan hingga mengakibatkan kawasan rendah dinaiki air.

"Dulu jarang dengar Sekinchan ni banjir, tapi sejak beberapa tahun kebelakangan ini musibah ini selalu menghantui penduduk setempat," katanya.

Peniaga kedai alat mancing, Loo Chen Lim, 33, berkata, tindakan segera perlu diambil pihak berwajib dalam usaha mengurangkan risiko banjir kilat.

Dia yang berniaga sejak 13 tahun lalu di Taman Sekinchan Jaya berkata, premisnya itu sering dinaiki air akibat masalah sistem perparitan yang tidak diselenggarakan dengan sempurna.

"Kadang-kadang, hujan



Boon Keong (kiri) dan Mohd Razali menunjukkan keadaan sistem perparitan di Jalan Bernas yang tidak diselenggarakan dengan sempurna.

berterusan selama dua jam saja air dah naik sampai di depan kaki lima kedai.

"Keadaan ini tak selesai

dan kami harap pihak berkuasa dapat turut padang dan lihat permasalahan yang kami alami," katanya.

Ketua Pemuda MCA Bahagian Sungai Besar, Ng Boon Keong berkata, kejadian terburuk berlaku apabi-

la sebahagian kawasan di Sekinchan menghadapi banjir kilat, Sabtu lalu.

"Antara kawasan terjejas teruk seperti di Pasar Awam Sekinchan dan beberapa premis perniagaan di Taman Sekinchan Jaya.

"Rata-rata peniaga pasar merungut sebab pelanggan berkurangan hingga menjelaskan sumber pendapatan," katanya.

Boon Keong berkata, masalah itu juga mendapat perhatian serius Ahli Parlimen Sungai Besar, Budiman Mohd Zohdi, yang meninjau permasalahan yang dibangkitkan peniaga dan penduduk.

"Kita mahu tindakan proaktif dibuat untuk memastikan isu pengaliran tersumbat ini ditangani segera," katanya.